

'Sti picciotti d'ora

Ma chi nni sannu!
Si sentinu favi e finocchi
ma nun sannu d'unni cuminciari.
Hannu tutti così a pertata di manu
e nun si nni sannu apprufittari,
mancu si sunnu ammuttati.

A li me tempi pi parlari cu na
fimmina vidivamu li guai di Cristu.
Ora, su li fimmini a diri: "Te mancia".
Cci 'nteressa sulu aviri na birra 'manu
e ghiri ridennu pi nenti. Natri, 'nveci,
vulivamu quarchi atra cosa 'manu!

Ora si nni vannu a la discoteca a ballari
.. tunchi .. tunchi .. tunchi .. tunchi.
Mancu lu sannu chi si pèrdinu.
Quannu natri ballàvamu, la fimmina
nni la sintivamu tutta di 'ncoddu
ballàvamu stritti comu du sardi.

Li sudura nni sculàvanu di la testa
finu a li pedi, ma nun nni spustàvamu
mancu di un millimitru di la presa.
Èranu mumenti fatati, ognunu cu la so
fantasia faciva tutti così, e a la fini
di lu ballu cci facìvamu l'inghinu.

A la notti 'nta lu sonnu cùntinuàvamu!
Pariva veru, ddi vasati facìvanu 'un
scrusciu ca si sintivanu di cca a la
stazioni. Atri così pari malu dilli.
Ah! si li sonni èranu veru, avissi fattu
na carnificina. Ch'era bellu sunnàrisi!

Ora 'sti picciotti arridinu e iu chianciu.